

ihm also: Siehe nach einer gelegenheit auff einer Mauren oder zweyen Thürnen / da du zwen ständ haben kanst / vnd zu allen vier orten wol sehen kanst / stell erstlich das Instrument nach der fläche auff den stecken / vnd ruck die Regel A. E. zu dem andern stand (wie du in dem 6. Capitel gelehrt bist / vnd mach das Instrument vnd die Regel vest.

Wann du zu dem andern stand komest / must du die Regel wider auff die Grad rucken.

Demnach so rucke die Regel A. F. gegen der Schank / so mit dem c. verzeichnet ist / so findest du auff der halbrunden Schyben 25. Grad / die schreibe auff / vnd mach ein gemerck in das Wax / wie du gelehrt bist.

Weiter / ruck die Regel zu dem d. so findest du 46. Grad / die schreib auch auff. Weiter / ruck die Regel zu dem e. so findest du 75. Grad. Weiter / ruck die Regel zu der Schank / so mit dem f. verzeichnet ist / so findest du 119. Grad. Diese Zahlen sollen aufgeschrieben werden / mit sampt den nammen der orter / wie sie in der Figur mit den Buchstaben vermerckt sind.

Du magst die Standregel vermehren oder vermindern / nach dem es weit an das begerte ort ist

Hab gut achtung / daß die Regel A. E. nicht verruckt werde / sonst wurd es alles falsch.

Demnach gang zu dem andern Stand / vnd misse zwischen dem stand / so findest du 176. Schuch. Ruck das Absehen G. auff die 176. Puncten / alsdann ruck die Regel A. F. auff die 25. Grad auff der halbrunden Schyben / vnd ruck das Absehen H. gegen der Schank / so mit dem c. verzeichnet ist / so findest du mehr als 1000. Schuch dahin / so ruck du das Absehen A. E. auff die 88. Puncten / das ist das halbe theil von den 176. Puncten (oder Schuch) vnd findest zu dem c. mit dem A. H. auff der Regel 800. Puncten. Weiter / rucke die Regel auff die 46. Grad / auff der halbrunden Schyben / vnd ruck das Absehen H. zu der Schank d. so findest du 991. Puncten. Weiter / ruck die Regel auff die 75. Grad / vnd ruck dz Absehen H. zu der Schank e. so findest du 959. Puncten. Weiter / ruck die Regel auff die 119. Grad / vnd ruck das Absehen H. gegen dem f. so findest du 615. Puncten.

Nun begerest du zu wissen / wie weit ein jede Schank von der andern seye / so thue ihm also: Rucke die Regel A. E. auff die 25. Grad /